

四庫全書

集部

欽定四庫全書

集部
定字集卷十

詳校官中書臣賈鍈

侍讀臣孫球覆勘

總校官編修臣王燕緒

校對官修撰臣吳錫齡

謄錄監生臣楊其梓

欽定四庫全書

定宇集卷十

元 陳櫟 撰

書

上許左丞相書

延祐二年正月吉日學生新安陳櫟謹齋沐裁書
拜獻于左丞相公先生鉤座前櫟聞之周公往百
世無善治孟子沒千載無真儒無善治聖賢之道
不行無真儒聖賢之道不明道不行而猶明焉以

其講明見諸推行道猶有可行之日道不行而併
不明焉則人心昧昧乎莫知所之而道終無可行
之時所謂百世無善治者如漢之蕭曹丙魏唐之
房杜姚宋非不可佐天子相天下而事業終有愧
於古所謂千載無真儒者漢儒莫如董仲舒然言
正心而不及誠意唐儒莫如韓退之然言誠意而不
及格物致知是以雖能著衛道之功于一時而無以
任傳道之責于萬世故孟子而後能為往聖繼絕學

而任傳道之責于萬世者曰近世之周子程子而集周
程子之大成者有朱子焉朱子之學初明于東南而未
明于西北恭惟先正魯齋先生鍾乾坤之間氣于覃懷
而挺生真所謂豪傑之士北方之學者未能或之先者
也首宗朱子心會身行適時得君倡鳴道學上而啟沃
乎聖主次而啟迪乎儲皇又次而作成乎賢士夫夫其
有功于斯道大矣以不世之真儒佐聖世之善治道不
特明于斯世且將行于斯世矣天不憖遺賫志以往善

繼善述有先生焉孔孟周程之嗣子未聞其家學繩繩如先生之繼先正者天獨厚于先生天其無望于先生乎聖主繼興緝熙聖學開文明之運為科舉之行贊皇猷定科條壹是以朱子之學風勵海宇以經明行修責望多士先生之功居多親勞徒御策馬南來江浙省闈躬為董督壹是以寬厚加惠多士先生之功又居多政聲洋溢豈久外藩不日召還又闡相業使道之未盡行于先正者盛行于先生繼孟子之真儒成周公之善治

天下蒼生不于先生乎望將誰望哉此不特天下蒼生之所望聖天子之望也而實天之望也有如櫟者新安之晚學也生文公之鄉讀文公之書少知留心老尤篤志學校縣府舉之以應鄉試偶爾儼倬近歲前十一月間貿貿北來將侍同行赴都會試豈謂薄命感冷途中到此之初即已伏枕是以雖欲首拜光範之門而不可得至十二月初六日衆皆舟行病魔獨尼之今療病理甫瘳期限已迫勢已不能前進觀國之光則惟有退而

守先王之道以傳學者而已然不一拜下風望大賢之
威儀聞一言以自壯則是將虛此生全虛此行也竊惟
文公闕里乃古建古欽二州二州儒士素盛于東南實
賴父兄師友之教耳濡目染有素而然所謂魯無君子
斯焉取斯者年來老成凋謝後學荒唐唐寢不如前良可
慨嘆而又任庠序之教責者多非其人又所謂以其昏
昏使人昭昭者今茲鄉舉猶幸古欽掛名者有魯兩生
不至大為文公羞焉櫟二十年來畧有編纂不敢一毫

不祖述乎朱子又或就其白窠中而發明之于語孟有
口義于易有讀易編于書有書解折衷于詩有述傳句
解于禮記有集義句解于史有增廣通略之類貧不能
刊僅所刊語孟口義一書而已羽翼先儒之書以模範
子衿之輩雖自弱冠以來不能一日舍筆耕而食然及
人者終有限焉區區之愚不無望于先生先生矜其貧
病而遣之歸乎唯命其許之待後舉而赴都還試乎亦
唯命其或造就之任紫陽書院山長或任徽路學學正

使得以朱子之學迪後進以續紫陽之燈乎亦唯命願
先生歸相聖天子繼先正以明此道于天下櫟也不敏
亦可畧助明時使斯道略明于朱子之鄉焉干冒威尊
下情無任惶懼之至

上秦國公書

延祐二年八月吉日學生鄉貢進士新安陳櫟謹齋沐
裁書百拜獻于平章大丞相秦國公鈞座前櫟江南一
寒士望翹材館遠在九霄上安敢輕以書瀆若稽昌黎

韓子亦嘗以鄉貢進士上書光範之門以此例之或者
其可又以黃清夫相門之客櫟之良友也託其貢書似
非無因而前是用忘其微賤輕叩洪鈞首祈相度天寬
略垂聽焉櫟聞之姬公沒百世無善治亞聖往千載無
真儒無善治聖賢之道不行無真儒聖賢之道不明漢
唐以來徃徃坐此恭惟國公大賢間世遭時得君可謂
繼亞聖之真儒致姬公之善治遠方寒士雖不能盡知
輔相大業然海宇蒼生沐浴于深仁厚澤中豈非聖賢

之道得公而行乎科舉宏開昭昭然以朱文公之學揭日月而行之天經人理復浸溉士心聞皆公所建白豈非聖賢之道賴公而明歟櫟也幸際斯時忝與士類前歲應江浙鄉試偶在選中結友買舟期應會試亦既至古杭行有日矣倏爾遘疾衆行獨留療經逾年甫得痊愈試期已迫度難奔趨然亦不敢擅自歸也告狀杭州路錄事司勘會移闕始克還家尋繹舊聞以待學者繼獲覩書坊所刊會試程文內有科錄程試該載聖旨內

一欵如櫟等不曾會試病患來遲之人亦許得與寸進
堯言遠布信如四時猗歟盛哉真激勵作成之大造也
櫟生于前壬子歲犬馬之齒于今六十有五矣羣材皆
春散木尚槁豈造化之有偏特未有聞于鈞前已耳櫟
也生朱文公之鄉學朱文公之學自少有志至老彌勤
發揮先儒之所未盡言諸經幾遍雖假館授徒不能一
日捨此以食然其及人終不為多倘蒙鈞慈欽導已降
聖旨照年六十以上例除櫟一泮水近闕使得及此已

老未衰之年以平生所聞于朱文公者與諸生講明而躬行之作養成材以待選舉或使道略明于鄉郡則未沒之年皆感戴之日也謹託清夫為聲悃悃惟國公垂憐焉干冒威尊恐悚無已櫟再拜

上馮路教抱甕先生書

五月吉日學生成德齋生陳某謹齋沐裁書再拜申呈于路教翰相先生某聞盧誕有言曰經師易求人師難得所謂人師者何也非童子之命之師也非一卷之書

之師也非家有塾黨有庠之師也道高一時名重一世
家傳文獻淵源之懿身任人物權衡之責夫是之謂人
師之人也生而時焉之不同不可師也時同而地焉之
不近不易師也其時同而地近而其勢分之大相遼絕
雖欲師之而不得師也若夫經師者由百世之後等百
世之儒以方寸之大君對方策之聖賢一開編而可得
也奚其難今天求馬必于冀北求木必于鄧林求學問
文章必于鄒魯也漢之淵雲宋之范蘓皆以蜀珍雄天

下今先生實以之今夫后稷之孫無脩穡伯夷之兒無
奪席其所耳濡目染者有素也是以論其世也故衣冠
之家有閥閱豈惟衣冠哉學問文章也亦然聞先生家
自鴻碩先生以來世傳學問之燈世擅文章之錄則先
生真學問文章家之有閥閱者也而又刻苦以世其傳
沉酣以飽其蘊腹萬卷書足萬里路以老懿身任人物
權衡之責者非乎櫟也以時論則幸與先生並世而生
以地論則先生適來教于吾州以勢分論則先生師也

櫟亦可備弟子列者也。以人師之難遭而幸其機之適，遭不求師之將何時哉！此櫟之所以來也。抑又聞先覺者教人，後覺者教于人；教于人者而不遇名師，儒是求珠玉于鶉衣而怨其不吾予也；教人者而不得才子弟，是投珠玉于暗路而責其不吾受也。故後覺之心每患名師，儒之難遭而先覺之心亦患才子弟之難得。昔薛公奎至成都，得范景仁曰：「吾喜得一偉人。」朱文公至臨漳，曰：「某來漳州，獨為吾道得一陳安卿耳。」前輩之喜得

才子弟甚于後輩之幸遇名師儒也櫟也生五歲而讀書十歲而能文十五歲而僭為童子師始也科舉之法行于時文之外知有窮理之學不屑于時文而已也繼也科舉之法廢于吟咏之外猶不變乎窮理之學不專于吟咏而已也今也學不前人年不後人悠悠蹉跎進寸退尺犬馬之齒且三十有七矣先生倘以為可教而辱教之雖不敢自詭于蘓門之晁陳亦必不敢叛去為韓門之籍湜也此又櫟之所以來也抑又聞先正鴻碩

先生之春秋通解胡文定嘗採取之櫟願學焉而未之見也昔有欲讀書不能得而為人傭書以讀之者又有欲傳龔氏易而挾餅代食以求傳者櫟也竊有志焉先生倘矜其立志之勤而慨然肯以家傳之學傳之是又因人師而得經師也此又櫟之所以來也惟硯是田無稅可役其來也實異乎衆人之來是以先陳此書叙其所以來之意惟先生其幸教之千瀆師嚴惶恐無已

上張郡守書

延祐元年正月吉日路學成德齋生陳櫟謹齋沐獻書
於總管大學士相公尊先生台座前櫟嘗讀昌黎鄆州
溪堂詩知東平為山東巨鎮久矣近歲以來中原文獻
萃于東平表表奇偉有先生焉先生把麾姑孰以德行
文章為政事有古人風今之士大夫無是也嘗恨不得
以拜下風廉頑立懦居無何而先生為吾郡來矣某一
介晚學附籍郡庠累重家貧假館苟活每一至泮裏糧
倩僕良不為易茲聞先生下車方新士民胥慶前日欲

拜而不得者今何幸將得而拜之所以勇于一行為吾
郡士民賀亦以自賀并將鳴其私焉某生朱子之鄉學
朱子之學性膏理髓嚅嚅迄今竊嘗編述發明朱子之
說為論孟口義編書解折衷詩述傳句解禮記集義句
解等書鑽研探討捨朱子之書不好也幸遇聖朝肇新
科舉一以朱子之書風勵多士鯁生平生所學庶幾少
可自見學校公舉以充職員某也雖愚何敢自棄固宜
聞之踴躍以期無負聖天子教養拔擢之盛心奈何極

貧無資莫能自致學校體例諸生年六十以上者給以
月糧某犬馬之齒六十有三矣例當有請前時以館寓
瓢繫未之敢請今茲幸遇先生學道愛人之賢師苟不
仰首一鳴復何時哉倘蒙指揮學校給以三五月耆儒
糧米使得少助往來之費實拜生成之賜不淺鮮也某
平生編述僅刊口義一書字細紙惡不便台覽冒昧謹
獻一部或可以呈之舍人焉耳又有感于溪堂之詩曰
謂吾公父孰違公令吾郡士民以之又曰公無斁遺此

邦是庥先生以之干冒威尊無任戰栗俟命之至

賀鄧祭酒書

七月吉日契家學生陳櫟謹齋沐裁書百拜申賀相公
匪石先生釣座前臬自別先生亦既累載聞先生得時
行道超遷不一遷亦當修辭貢書特賀不一賀竟隨魯
人之稽臯者以萬里寄書恐遭洪喬之浮沉也今茲乃
敢飭尺箋瀆丈函以遇便極的保無石頭驛事惟先生
垂聽焉先生自廉車而翰苑自翰苑而祭酒固古今儒

者之至榮實今日儒臣之尤重自建祭酒以來責莫重于今日而先生身任之甚盛甚休多賀多賀竊惟祭酒之名其來尚矣古者主有盛饌賓推老者一人舉酒以祭故以祭酒稱昉自荀卿為齊三老稱祭酒焉漢之侍中魏之散騎常侍功高者並為祭酒其名重矣而猶未也漢置博士十二人推聰明有威重者一人為祭酒謂之博士祭酒官漸重矣而猶未也晉咸寧中立國子學置國子祭酒國子之名見于周禮師氏以三德三行教

國子保氏養國子以道而教之六藝則國子祭酒即成周之師氏保氏其官又重矣而猶未也齊建元中置國學祭酒有改國子學為國子監仍置祭酒而唐因之又改祭酒為大司成未幾復舊領國子學太學置祭酒一人專掌監學之政且令儲君受業焉執經講說必以儒學優重者為之其官愈重矣方之今日則彼猶未也恭惟先生世擅蜀珍望隆時棟備君子所教之五而模範賢闕焉推天下達尊之三而羽儀朝著焉愚前所謂古

今儒者之至榮亶其然矣所謂見當今儒臣之尤重果何謂也太學國子祭酒前朝有是官矣重是選矣為太學生國子生之宗師而已矣其于啟沃上心贊襄聖學未之及也欽惟聖天子聰明天縱緝熙月將俾祭酒之臣進陪講讀發明帝王心傳之懿講貫修齊治平之本于以紹道學於既往開太平于方今皆責之于祭酒是合經筵賢闕為一官而委重于先生愚故曰見今日儒臣之尤重蓋謂此也此蓋即唐朝儲君受業之意而充

廣之非近世太學國子祭酒專任學政之比也先生何以稱此尤重之任哉愚知之矣不出先生前所提調校刊之書而已矣大學一書君天下者之律令格例也真文忠公大學衍義一書儒臣毗贊聖學之根本龜鑑也如有用我執此以往先生平昔所有志而未得行者今得行其所志不在此書其將焉在上而啟沃下而訓誘竊料必已熟講乎此矣愚猶不能忘言者亦欲先生之知其知我心也既負襄聖學其本體也佐興聖治其功用也

有本無用非學也以耆壽俊為社稷臣愚將大有望于先生焉近江東僉事郭公會間談及先生三日一進講積誠感動研精數陳可謂致主澤民千載一遇矣近世明經遙講義必推廣經義以達于治道不徒空談道理而已東南民力吏治之利若病先生之所熟知昔欲為一道之福星不得專焉今雖未沛天下之霖雨將有待焉陰滋潛潤本于沃心昔唐令儲君受業所以預培他日治平之根基今茲俾執貝囊聖學可以立見當世治平

之效驗豈直教雨沾濡于館下諸生而已學顏子之學
志伊尹之志使是君為堯舜之君使是民為堯舜之民
此尊先正覺民生先正之有志而未酬者善繼其志而
酬之不在先生乎先正之所以期望于後之人者其不
在茲乎愚此書之賀實為先正賀為天下賀寧惟太學
國子諸生賀而已北望賢闕與星同拱惟先生鑒而恕
之不備

與胡雙湖書

啟蒙通釋中揲著五四為奇九八為耦處初學者或不
能通昔嘗思之五去一而為四九亦去一而為八固也
然四何為而為奇哉意者揲之以四以象四時四時具
而後為一年者一具四時一年之象也此四時所以為
奇者兩其四時兩年之象也此八所以為耦先生通釋
中意必以易曉而未之及愚謂曷若明白為後學言之
耶高明以為何如

答胡雙湖書

三代以後年數易考有甲子哀定以前年數難考史與稽古錄世多牴牾恐難一一以稽古為定通略說克明峻德處以為修齊治平此說出于溫公朱子述之耳不意此老已見到此今見稽古中可考大學宗祖之說出真西山衍義其第一章即載堯典一章說秦世變升降處其說出尹起莘綱目發明此外雖不無祖述今亦難一一盡述此其大者却不可掩為已有論明帝崇儒之虛美不足蓋召佛之實禍批教抑之太過愚謂不過虛

美耳渠之崇儒先儒于富之教之章已畧及之未是十
分美事畢竟邪正不兩立既有召佛入中國之大過則
雖有崇儒十分好處不足言矣序文未作終必須作向
有一族弟見通略謂當春秋戰國時說及孔孟後來未
及增此先生纂要如已及之甚好如未也請添入然後
以一大議論包括之意欲謂三代以上治與道合經與
史合三代以下治與道分經與史分朱子謂呂伯恭不
合先看史贏了眼只當先看經此後世經與史分故也

二帝三皇時治統與道統合聖賢達而在上道明且行
此時經即史史即經也帝王往矣治統與道統分道統
寄于孔孟窮而在下之聖賢道雖明不行矣是後經自
經史自史也史雖有司馬遷班固以降諸人及司馬公
通鑑其畔于經者多有之今吾輩纂要通略之作提起
伏羲為道統之祖而又提掇克明俊德親九族章以修
齊為治平根本自可以斷盡三千年君德相業以經之
道斷史之治史即經也且可為宋三百年事張本將述

周程張朱以俟他日續下筆又何者史粗了眼之患哉
先生苟不下此筆某明年當為之大掃一片議論以洗
近年一種鄙薄道學謂與晉人清談同科之謬論先生
鑒此意否

又答雙湖書

癸巳之冬先辱謙翰隨即齋沐修答未知其得達矣否
今年夏書坊之所有刊易本義亟不論錢買之研朱焚
香每一展玩每一景仰方此梅邊細讀見梅見易如獲

見君而謙翰復翩其飛隆矣亟為展誦乃知旃蒙協洽
午夏方徹紫石稜一以不墮浮沉為幸一以寄書難達
為嘆也以多問寡抑損勤劬某也何人可以承此此盖
執事學愈高心愈下不自知其辭之謙耳附注詩傳此
一段大事前歲聞有此舉甚以未得一聞緒餘為歉繼
而似山玉甫二丈相見聞皆謂左右釋詩多有可疑讀
詩之功不逮周易因叩其說皆謂如崇墉言言不當訓
為言議之類他却不能舉今讀來教誠有此說某竊謂

文公於六經惟易詩特筆成書自謂易被前輩說得道理多了恐翻這窠臼不轉至于詩無復遺恨後有揚子雲者必好之其訓釋亦云當矣今欲附語錄纂諸家述已意但存他說以互相發明或發其餘意之未盡者足矣不必過求異也今承來示謂詩解見謄數段去復注其旁云不暇錄惜乎某不得親見其說徒以條教大畧及所聞于人者想像蠡測而管窺之當于何許而考核其真是之所在哉牛羊腓字之腓引易咸其腓証之極當

崇墉言之言引于時言言証之恐未當于時乃虛字
又有于時語語相連其為言語無疑崇墉乃實字以上
下文閑閑連連安安及下一節第第仡仡文意稍詳之
此不過言其高大之貌耳不如只依文公說為當此等
連字據古人出口叶韻為是耳兼古字多通用兩言言
各自為一義不相妨也不顯不時等不字只依舊說以
為豈不顯豈不時似不可易大率詩人之詞緩反其詞
以逆其意而讀之味在言外後來人多如此下不字今

人開口亦多如此直訓為不顯未見其得履帝武敏歆
此乃古事之荒遠可怪難明者先儒釋之大槩有两說
毛注則謂姜嫄躡帝嚳之步武鄭箋則謂姜嫄履天帝
之指拇毛說似實鄭說似怪然惟其怪也不由人道忽
爾有娠是以三棄之而卒收之遂名曰棄使只如毛說
因祀高禘夫唱婦隨由此有子此乃事理之常復何怪
何棄乎文公取鄭說非好怪也蓋以神聖之生異于常
人容或有之如天命玄鳥降而生商之類耳故取鄭說

冠于前以蘓張二說証于後考究至此他亦說不去矣
今存毛嚴之說以互相發明亦自不妨但不可必是此
說而疑于前說也要之如此等處姑存而勿論可也縱
巧為之說亦有何益據愚之見左右于易不十分自立
說其附已見者不過十之一二耳今釋詩亦須如此前
輩之說灼然未盡未明而我之說灼然穩當明白者則
出之不然不如其已不必過于求奇以來云云也兼聞
入閩之期已的恐一刊印後改正便難幸聞有熊先生

老成宿儒相與參定必無輕易如見熊公後千慮之得
倘與之符願左右勇于刪削只存其穩當者稍涉奇異
不契公論則棄去之使正大光明為無纖瑕之拱璧與
本義附錄纂註久遠並行不亦善之善者乎未板行間
已聞異議一板行後使果有受人指點處悔之何及大
槩朋友間樂美服義者少嫉妒背非者多某平生無他
能頗酷于樂善耳以左右下問之盛心純實無偽知其
必能服善故敢直以所聞所見為告若夫嫉妒背非萬

萬無之但懼或者之不免也外承寄示易辨極感極慰
陽虛陰實之謬左右謂與佛老異端之學何異愚直謂
此與兒童之見何異耳闢之甚不難但盡裒一部易中
說虛實處而與之辨能如此詳明的當則非精熟于義
經者不能也正論日揭異說冰消盡美盡善敬嘆不暇
某受賜宏矣某十三日午方得解初九所惠書外批索
報甚急且又聞道存歸期在十五日恐蹉此便欲寄良
難是以亟亟匆遽治復只據一時愚見述之直突覲縷

恐竦曷勝何日一拜下風少罄所蘊未見惟厚自珍
伏干台照不宣

答胡雲峰請考評書

昨賓暘行僭厓略數行字以請茲領教墨三復如侍典
刑大槩人之作文自是者多服義者少非純不服義也
亦多有自知不明而不知己之為非知人不明而不知
人之為是者彼有一等私小之見橫乎胸中恥己之失
惟恐勝己者又不論也此所以易于召閑也二三先生

納之閭闔中亦既解命矣鉅帙六謹以緘付來使前數
名外其餘不欲嚴于去取要亦無以大相遠其雜排之
以附于後惟命其截斷不使太泛亦惟命至于銓次之
間某管蠡之見豈敢自以為是不契尊意處聽自高下
置之更唯命秉卓然之見以持公論之衡鎮喧囂之辭
而立吾道之幟不能不于先生有望焉經疑前六篇實
欲作者主名知其文不知其人亦理所不可也其餘諸
經古賦俱乞于後便中寵示金榜批教姓字卷上多撰

他名或代名不可以為據敢乞拜意玉湖相公先生尊
賜皆出雲峰之吹噓感戰感戰已修謝書并及之矣回
仲儀郡博一緘併此附去頤指呈達為荷楮短心悠未
究忡懃惟高明鑒之未見間更望珍晉以壽斯文不宣
備

答胡玉湖請考評書

某自一二十年來側聞執事先生允協輿情丕承先志
以明經一脈倡率士類佐闡人文甚盛甚休由是歸心

門牆積日如髮第未獲一拜下風常用悵悵以為此生
欠事詎圖今者會友以丈巨帙累重誨以銓次嘗轉託
雲峰先生力為辭之雲峰不特不善為我辭且勾引先
生賜之劄翰于是乎黽勉披賞不敢辭矣甫得竣事謹
以授之秦綱望賜台電一矚之未知能愜高見契公論
否耳恭惟先生于玉比潤與湖俱清振起斯文是亦為
政後舉不過一再秋風迂續丈公丁卯之氣數機關所
繫未必不由于斯標也預以為賀至于憫熱惱之瘴衣

之以疊雪之輕解粧寒之圍飫之以松明之紅此意厚
甚下拜之餘附此以謝未知何時掬湖中玻璃玉以洗
昏花以快披覩臨楮不任拳拳

答王仲儀書

櫟去歲聞琴書寓考川川泳雲飛良深健羨今春方以
未詢履祥為欠而雲錦天落矣三返五復何快愜如之
明經課評荷雲峰玉湖二公舉以見諉老病荒疎懼不
任此方控辭間執事又從而慫慂之亦既黽勉拜命矣

或以名聞公能為之解嘲否也貴州髦士如林得諸公
又從而鼓舞之其雪去秋庚申之耻而逌文公丁卯之
運近在後秋轉瞬見之耳全在雲峰老師與吾仲儀老
友領袖後進以為文公闕里增光區區不無望焉何時
得握手劇談以豁愁思

答胡雲峰書

近齋心价者捧至教字披誦方知有八月半之翰而未
領隨即虔答索及四書發明四小帙附齋心回便拜呈

今不知已到未此月望賓陽方進示前翰連張累紙詳
續謙厚雖得前席而聽何以過之快甚慰甚賜報諸作
姓名明經人才之盛足見師友淵源敬嘆久之王葵初
聞其名矣董季真以乃翁所編蔡傳附錄纂疏來竭力
與刪定補註內其葵初批字刪除處見其學識不凡因
附書達葵初不蒙一字之答想是季真匿之其說甚長
他日有會晤緣當及之拜問本義二條寫去之後隨即
悟文言乾九二夫子明有乾德中正語已悔所疑之過

今蒙詳教頓覺豁然以程子中無不正及未濟九二證之了然矣朱子曰九居二本非正以中故得正也此亦易不可為典要之一知正例而不知變例固不可也惕厲亦是至疑蒙批教詳明尤幸尤幸朱子曰無疑處却要有疑又要無疑使我之有疑得以無疑者先覺之賜也感刻感刻賜報本義通釋外尊者不一既未板行又難盡借又賜報四書通旨之著前信方謂未成書以今尊諭覘之書成矣坊中四種附錄為最繁疏多不滿人

意集註依樣畫葫蘆而已不堪視覽故不得已而有發
明之編今蒙批論謂纂疏集成多有差繆可謂先得我
心又報集成外添得數家亦難得也大學有盧玉溪通
義最不易想亦在一家之內若夫北溪之學庸講義陸
坦之木鐘集纂疏已略取之但未盡善爾前信欲拜觀
通旨數十板以見規模大槩賜教為幸顒望顒望

與張純愚書

某嘗讀龍溪諸誌銘及碧梧所為龍溪誌銘知德興之

張甲天下又嘗讀伯東伯大之程丈知具文可示法天下未識其後人何如人也二三年來偶于胡兄所見穎叔字說固知有純愚猶未悉繼于地理楊兄所見葉氏牧隱吟卷作者無慮百人獨純愚一說超然傑出亟錄之敬服焉然猶未悉然料此必德興之張也謹識之心意謂何當得見斯人而交之今年携書此來與二程君交偶談及牧隱說二程曰是吾鄉中雲人所作繼而蘭叟此來又及之蘭叟方曰純愚本德興人乃徙而占籍

于婺源耳愚然後方自喜聞絃之能賞音而所料果不
謬也知蘭叟將有考川三役拜會之期遂于臨歧祝之
為寄聲于純愚先生非不欲書未敢書也蘭叟再至則
荷寄聲且曰欲寄以書以冗未及寫雖未得拜讀已領
盛心某何修而辱先生先施之哉夫然前後之不敢書
者始敢書矣所以有牧隱說之云云者蓋如老泉所謂
亦欲執事之知其知我也若夫不肖則以何者求知于
執事哉某自少頗知經之當明今老矣犬馬之齒六十

有一矣而經猶未易明也嘗謂仄仄平平之詩俗下應
酌之文儒家事業詎止乎此而一望茅葦盡疲精神于
此嘗心非之聞考川有明經書院司教事者雲峰胡丈
執事與為僚其必皆注意于此而實能稱乎此多賀多
賀健美健美庚寅識雲峰于郡城今二十有三年無由
再見請談次得一唾名問興居幸甚某三十年繆作俗
下應酌之詩若文去秋東屏不戒于火俱燼焉不足惜
有一增廣通略乃因雙湖胡丈所刊史纂通要而再訂

正者無他本亦燼焉書解折衷詩述傳句解禮記集義
句解語孟口義等未審何時得執以北面求印正于先
生乎所抄先生牧隱冊子亦燼矣先生窮微臻奧是惟
無出出必超邁似此者何限嘗一嚮想全鼎因風可賜
教一二否願也不敢必也問先生之年于二程君皆不
能記因筆不妨批教拳拳及此者亦老泉張益州畫像
記之意也冒昧奉書不覺覲縷惟高明鑒之不備

與汪竹溪書

憶今春侍家叔掃松楸道經仞墻因獲遂識荆之願雖
老成典型時見清夢然以無謂不敢數動閭人詎圖謙
尊忽賜誨示乃以諸令孫彬彬玉立特有西塾之招非
老先生緣先曾大父燈窗之世契愛召棠之甘而忘戎
李之苦何以得此矧重以諸族多方吹噓左提而右挈
之某也又奚說之辭龜勉拜命矯首凌兢謹此拜酌伏
干尊照

與汪古逸書

今春領台翰詳密殊甚而持書人去急匆匆僅拜答數字不能道所蘊之萬一當緘去四書考異一小帙惜所刊不免有誤字不便台覽想能以意會之不審合尊意否耳答書初準擬暇時從容作之而匆匆無寧日便鴻無我過者迄今不能如願愧甚愧甚茲恃契厚僭有欲言同邑梢雲吳兄萬頃翩翩佳公子也屏山先生大尹之孫松所都巡之子篤志學問詩文俱工有令子年方志學欲從明師以玉成之某素與萬頃託交以此見詢

亦聞先生大名非一年矣小生遂力以先生為薦茲拜
此紙以達其意萬頃亦自作先生書萬望曲從其情慨
然諾之不特萬頃賢父子飽領誨益小生亦可時時請
益萬頃且有容小生詣其仞墻之美意若得償此願以
慰生平未得會晤之懷尤幸也亟亟拜字一生常苦匆
忙有王半山之弊先生一笑而鑒之恕之幸甚

答吳萬頃書

疇昔之歲輕抵鄭公鄉辱賜汲引僕輩急歸不果拜命

迄今愧之繼以惡詩道謝又辱寵和突過黃初壓倒元
白不足以言之也自後無謂不復嗣音悠悠迄今常切
崇仰斗山忽出台翰所諭敬悉小生與古逸汪交書不
一而未之一識此丈壬戌生好學好問朋儕罕見其比
每心服之茲體台意作一書達之中之以台翰可謂知
已又復篤教古逸必幡然應聘也自行之日必自酌之
得宜小生不敢出位而言也匆匆拜復不能治擇言語
來使鶴立不可稽之故耳伏祈台恕不具備

答曹弘齋書

某去臘三緘蒙瀆而辱嚮答之一是謙光十七日先拜
領十六早尊翰至次月初九日尊翰始至整肅披誦一
一如侍深以所代懇蒙允諾為至幸闔端新歲方顯佳
音而首翰又翩其天落矣亟展亟讀且審壽履康勝何
喜慰如之行狀示教仰荷重勤真是無一節不包括無
一字不研覃焉遷史筆韓柳文法允謂兼之非老于文
學其誰能為只如姿貌凝重意度粹夸八字已是畫出

一悟山翁矣良工心獨苦老杜所謂苦即先生所謂勞也必具隻眼而後能覺之已即授觀竹君感慰之深口莫宣述但令先代聲謝臆俟三虞之後專恪修書以既惻悰其長嗣仲煒亦附此引忱惟先生鑒之達虛谷書謹領俟遣杭僕併發纔有報章專當中納劉生適亦至矣即令下手春丁以前恐難得便勢只可於此行拜省之後以摹本拜呈也畫之一教真如耳提而面命之感激何可云喻

與呂存方書

司馬公有言某與景仁范鎮兄弟也但姓異耳余于存方

亦云少而密壯而疎勢也跡雖疎情則密義也戊戌十

一月初十日訪存方偶值其先尊伯大祥建齋在次日

整辦忽遽中存方力留之不容其去樽酒細論不以冗

奪待我之義豈不益于此可見而余竊有愧焉先君與

先尊伯交真是莫逆某故人稚弟也乃沒不及哭祥始

及拜記曰既除喪而後越人來弔得無近之乎一語識

愧存方其教之乎

異姓連行雁少時同隊魚膠投情最密梗泛迹因踈
下榻匆忙際論文應接餘幽冥負父執來拜迫祥除

答金滄洲書

櫟憶去秋道鳴珂暫簪盍自後雖坐嵇康之懶不書不
面然僕心似江水日夜向滄洲未嘗暫違也昨辱觀萬
先生枉顧道美意出華緘何修而得斯于滄洲欣幸無
數櫟唯稅侯之門先君先叔俱嘗游焉不肖何人俾繼

此躅雖出觀萬愛念之意汲引之勤然自非滄洲義娥
其觀人之眼溟渤其容人之量亦安能于總總客處中
知有所謂陳櫟者又詎肯于故人下客之子而期以愛
必兼愛也哉櫟行四方得此于人蓋寡此正願擇所從
而未之得者矧重以觀萬稱道誼雲之高不容口此而
不從其將奚從以此言之聞命即拜疇不謂宜然自今
客他方則可在父母之邦則未可見主人館我今五載
略無間言義合控辭然後拜命及力辭之而主人苦留

之形留神馳殆兩決旬進退維谷將如之何方欲修不
能拜命之報章候伺觀萬到館端人申納而觀萬又此
來矣苦辭求決而主人終苦留不放輕帆好去便吾道
付滄洲昨雖屢哦此詩今牽掣其事乃爾舟近蓬萊風
輒引之分也夫還珠淚垂可勝淒斷負觀萬滄洲二先
生之深知非意也勢也事會無極豈必終無効驅策之
期哉肅此修謝萬冀赦原治報魯臯臨楮慙汗伏干穹

照

答汪竹溪書

某早歲侍松坡老師坐知羣從多典刑嶺雲隔之尚欠
立雪不圖今遠貽音書及賤姓名誰誤聽熒胡嶺雲不
能隔之耶巡簷聳觀梅花與有德色今孫森森立竹方
就師模如某迂疎掄選見及不由介紹特達相知樂莫
樂兮固已心許矧重以朱丈昆季之慇懃乎然某于梧
山賢周魯託世契依劉已十餘年詎敢不告而去之戀
戀綈袍尚有餘意坐是欲遽拜命而未之可謝蘭實桂

正晉子野所謂好學如日出之陽者授受緣法天苟相
之少緩歲年安知暫睽之不終合今日之不輕去河南
氏者即他日之不輕去浮溪翁者也別楮不敢留謹璧
歸之記室眎入萬幸令小阮提領郎卿不及另幅聲謝
附此引忱惟是有辜嚴命非意也勢也伏告穹照不備

與徽學屠教授書

名約字存博

某頓首加拜謹呈路教提舉月汀先生師席某隆冬逆
旅獲瞻師橫語未終別去鷁退螻屈天乎人也何尤扶

憊而歸過郡城不敢以藍縷見意謂繼必可以從容請
教豈期三載竟隨魯臯非先生鑒之以日星之明容之
以江海之寬某也寧免于戾徽泮積弊如蝟先生以嚴
正公廉一洗之昔朽然而不足今霈乎其有餘惜也斂
此經綸整頓之手僅施之一數學而未大用也雖然嘉
聞美譽無翼而飛豈無能以轉聞者先生自此升矣預
此多賀某散材也自度無所可用惟致力先儒之書發
其蘊以圖不朽而已去冬編蔡書傳附錄增註已成已

與番陽一董兄謀刊之閩坊矣見編四書章句集註發明亦將過半未得求印正于先生殊以為恨也干冒師嚴無任戰汗顚僂之至

與吳子靜書

久不奉問惟有尊仰中間疊辱頒餉不及一字聲謝簡慢之咎奚以自文然無心之感為感乃感之真不言之說為兌乃說之至即辰歲聿云暮伏想合宅尊大之眷均受福祉荒涼四壁蔑表餽歲之意者寸芹遣前物微

意全仲文好學有進深可為喜吾儕人家但如山谷所謂勿令書種斷絕其成功則天也如肯見過不必以歲暮為嫌

與吳執敬書

某遙睇宗衮公遨嬉處緬想高風無謂而書焉以為恭瀆也因以不敢襟度明豁必鑒此衷仲文來知尊履壽康良切欣喜去冬之杪辱令似桂山上舍盟書有收錄兒曹雅意雖乏便未及令具遵稟狀然已心領特有老

成典刑必覆燾訓誨之也區區本意欲令長稚一出仲
丈之意以為長稚故疾恐或不免有發時不如今小姪
勲孫應命此子雖教之十數年然未嘗出雖仲丈以為
可而某不敢必其可也所恃者先生以眷家祖行提撕
綱維之但令伴令孫相與習句讀務相去其不是不及
處不以客待之而以孫教之則庶乎其可先君之孫即
先生之孫也倘沐以先君之故施及其子孫俾得由此
漸漸稍慣可以悠遠藉庇某也未沒之年無非感恩圖

報之日也夫豈惟兒曹而已哉末由拜侍敢乞厚自珍
膏躋登上壽臨楮不任拳拳

與子勲

我本未欲遣汝出偶遇機會故如此汝須是自卓立自
爭氣自求長進自做取成人不可如前日悠悠見笑于
人今幸遇親家執敬老師重厚典刑可以親炙取法姊
夫子靜先生博淹修潔可以資問請益好文字好說話
隨手錄取歸日要觀仲文非特益友實足為汝師渠之

言一一謹守之不可一毫違之按渠之言而力行之永
永無失今受人子弟之托須是且以教人為急自己事
且放緩然教人讀即是我讀教人做文字即是如我自
做教人解書即是我自解教人熟而記得即是我自熟
自記得教人便是自學如此力行不特人有長進我亦
自有長進又教人讀書今雖不必與人盡解然我却
可不自曉得須是每日隨人所上之書逐段自檢看解
得曉得不可徒讀其句讀而不曉其道理如和尚念經

也每日早起晏眠除登廁外莫妄出一步不可與人閒
說一句惹是非待學生必正色端莊如此決不遭侮夏
楚人家多不樂此不宜施須是勤而有常謹審而不敢
輕易能守得勤與謹二字萬萬無失言語要簡而當從
容而分明最不要誇張妄誕學生事業與主人商量各
人具一日程而日日謹守之

答吳仲文甥

九十四首

近與曹公交信報中全出示乃尊八十老人嘆末章及

弘齋弘齋和一篇併尊文欲抄示以匆匆未果次第再
信索之得之當錄去也弘齋石假山詩曾見之因戲成
一首大意謂木山可言假石非假也一卷石之多卷石
即山之具體而微者且天下大小無定在莊生云秋毫
為大而泰山為小使有據鵬背而上九萬之上其下視
泰山亦卷石耳假義有二有真假之假有假借之假凡
有形于天地間而為人所受用觀翫者皆假我也名僧
有偈云百年借汝閒觀孫仲蓋嘗拈掇以為尺牘見之

註中雖泰岱齊魯青未了者齊魯之人亦不敢認為真已物
自羲黃以來泰岱亦幾換山主人矣與鳩氏不能終古常樂
之也今德父為今季子知在德不在山石小山已物而不認
為已物不過假借之以適吾之樂其德自可以不朽縱渠夜
半有力者不計也以此竟成古句一首不曾帶歸匆匆亦記
不全未及錄去又恐中間或者不察以為含譏遂不欲發要
之不過說正當道理末段嘗說得德父好處出矣吾甥以為
何如賢甥之說後篇五峯九峯之說不為佳不如前篇吾文

自有意深淡不妨不必為俗人遷就也如何如何令弟處留
下杜詩選半冊乃律詩望索以見示近見劉須溪杜詩註杜
詩本平易解而劉批反艱深其辭却解不得可怪見之否
然亦間有好處有暇欲盡註之但不知有力可成否耳

石假山詩曰木山可言假石山何假為一卷石即具山體
山之小者逾怪奇若謂卷石不是山撮土與地有二與秋
毫為大泰山小大小定在誰究之倘騎鵬背高九萬下視
秦岱應有茲吾謂假字有二義以假借言端有意人生字

宙間形聊百年偶凡所受用莫非假欲專一壑毋乃蔽田
廬山園併貨寶借以閒觀了茲世條來忽去或終身氣聚
有之散斯棄粵從羲軒昊項辛泰岱幾換山主人芳林崇
土艮岳石力為兒戲堪笑嗔秦岱真山青未了齊魯亦難
認為真爽鳩雖樂豈長樂但視為假常欣欣延陵德翁今
季子小山已物呼假耳元和在德不在山德意不朽山意
閒適吾人樂聊爾假不妨夜半有力者

又

弘齋雜作管見內有吾輩所自能見到者有舊已面得之者
其能廣人見聞者亦不少近見答一書甚詳盡敦篤末書一
絕云孫曹鼎立淡堯堂年歲珠聯寅卯辰或抱或攜無不可
老天照覲這閒人晚福真樂可羨也視虛谷將死五律之可
憐過之萬萬吳恕齋講義于朱學儘不差亦無大過人者皆
不肖所能知能言當摘錄之後便歸納

又

承索放翁詩見遣去其詩甚典雅工博極好學南渡後乾淳

以來詩人如此公者不可及矣承和詩肯將圓行應圓物
但以古心傳古人好周易二字不過周家所作之易三易
經卦皆八連山夏易也歸藏商易也今之易周易也伏羲
之易唯有卦名而無辭自文王作卦辭周公作文辭方有
今之易經孔子作十翼乃易之傳耳易交易也變易也交
易為體變易為用朱文公論之詳矣虛谷桐江續集有先
後天吟百首多好唯其中說周易一首不是以周為周流
大不是此不知何人好奇之論而虛谷誤信用之耳

又

承錄示尊先吳端翁正詩序及摘聯極感摘聯俱精絕
詩壇律起結小不滿人意而兩聯絕佳舊傳全詩數篇
豪壯工巧兼有之但不似蘇黃一輩之渾厚耳諒于中
原文獻之正脉有難以一槩論者歟誦其詩不知其人
可乎是以論其世也楊尚書名傑字次公號無為子其
名見于坡詩呂成公文鑑選其詩文近傳其為婺源胡
氏作綵衣堂記此詩序高于記相去十餘年筆力之進

如許可敬畏近示冊子胡餘學復卦講篇詳明不可及
何其中有云孟子謂伯夸太公蓋歸乎來斯朋來無咎
之證歟此引証失之巧矣齊魯瞻沈毅齋高弟名興龍
寶祐丙辰文榜易義過省許許山屋名月卿以易魁別
院所答魯瞻問易圖一書恐非山屋山屋文學不類此
看易圖亦恐未如許精到畧果其答想是初年清明在
躬之時但得魯瞻發問之書一觀方極分曉否則尋此
本義前所列諸圖及蔡節齋易傳後所說參看亦好然

此書中亦多有徒詳而欠下語精妥處亦容有誤處大勢自好

又

福姪授所惠字已悉喻及孟義諸真者誰乎甥舊自相為知己可也近日光姪至見記解必欲借曲禮上下去已付之所編述甚欲以傳知己庶廣其傳但在發去者見體早送來不失陸元本失之則拔本塞源抱恨無窮矣高作一冊遣下環秀亭賦據方公秀亭記之餘意辭

甚明暢多景軒記末因以箴之可取望遠樓記雖得之
心境記然亦不能全善三石說自虛谷千佛閣記來
亦佳逸老園記模寫工意趣佳斷制之法從弘齋南山
道院記來以逸老人之餘年餘年只可自言不宜施之
于親當作高年紀社文甚佳無鵠形矣幾以克人形也
克人二字當改作踐其得心亭記月齋記石假山說拙
菴說全善勉旃勉旃

又

前遣去孟子口義看後于盛意如何人回試一二語及
之老舅初十日歸十一日便下手解禮記今早奉先祀
午後讀之至晚亦了却內則一篇四日共十七版高作
一帙筆力大是長進咄咄逼前輩不止目前所罕見第
一篇賦意有所祖述漸漸看至中間漸入巖境老夫當
避路但勝是麗勝淡辭勝理年漸高筆漸老他日不患
不成霜降水涸未可即遣回當選寫數篇留以示人云
吾家亦有此宅相也老舅不能如山谷萬一賢甥殆過

三洪師川遠矣開春晴得好過我少欸但恨無可以欸
留者閔仲叔周黨相過惟飲水相視而已恐不免此爾
統祈孚亮

又

人至首詢椿桂消息知俱錦還各遂綵侍甚喜讀所惠
字稔尊祖老先生以次並納福老姊康健尤慰近來無
寸暇此為骨朽後生活他日當與賢甥細商之亦自憐
其自苦不能閔也念之否適閱所問至孟子首章仁義

義字之疑昨歲所成孟子口義已及之矣不可不傳之
吾甥先遣前冊去自謂稍能得朱老之意望作急抄之
換後冊去有一後序內專及此半作而止吾甥勉我成之
它日看也此無他藁他本萬告而珍之

又

伏承椿萱重疊之賜母乃如文帝賜張武以愧其心耶
兼尊孃安人貴恙如許何必稠複講此却則不恭受則
重愧感激之餘繼以嘆服也侍邊千萬為道謝意前日

所發示文字亟此歸納此一宗文字虛谷遠矣以下諸人之作何敢望其萬分之一虛谷之作切于小桃源尤切于今日進士之難之弊末出作序者與本人之名有手段且前純述志隱子之言後方為之作歌正用送李愿序家數番陽張仲良一絕句亦可取廬山千仞歐公賦盤谷兩山韓子歌險語奇文世常有高風清節士無多隱然有諷誡意下此而作者尚當于志字立議論諸人皆無發明得志字有力者匹夫不可奪志也若志立得

定灼見世當隱而隱莫說三徵九辟雖千徵萬辟亦不可奪吾之志方足以稱志隱之名若販賣雲壑邀射虛名如盧藏用之終南捷徑李渤之少室索價此而謂之隱豈知隱耶恐所謂程堯者亦不過借此為虛聲耳設有貲可求仕有媒可進仕未保其不奪志也以此箴之或可奪其膏肓

又

胡仲虎四書通庭芳委校之且令是否之好處儘有但

雞子討骨頭處甚多最是不以祝本為定本大不是文
公適孫鑑庚三總領題祝氏附錄云後以先公晚年絕
筆所更定而刊之興國者為據今乃不信其親孫之言
而信外人之言只看中庸首一節斷語諸本與祝本疎
密天地懸隔乃隱而不言而專以為政篇德之為言得
也得于心而不失一節來辨謂得于心而不失為定本
而非行道而有得于心之說得于心何必加以而不失
得于心是得何物不比據德云據德是道得于心而不

失乃是因據字而下不失字耳似此之類不少只是纏
辨數年前與之交頗信吾言凡所云云皆具存也

又

前日不曾戒甥一事夏秋之交最難將理將理之法第
一要不多飲水不特冷水不可飲雖熱湯亦不宜多飲
如遇小渴不如忍之忍之而慣自不思飲如遇大渴不
得已而索水不若只漱去煩熱畧略嚥些入胃腸不宜
引滿大吸快意一時以貽日後脾寒瀉痢之患也渴時

閉口卷舌插上牙之內自然有津液來候滿口細細嚥之自不渴此學仙妙法

又

照病且嬾勲亦不用心皆不可望能傳吾學者其吾甥乎冬末上來望帶取紙筆文字當傳者作急了之若悠悠半年僅傳一二何時是了近日某借人朱子語錄昨日一日抄一十二板不過循循寫未嘗汲汲也十詩甚感但稱獎過情自家舅甥只貴用實意不要如此啟事

甚妥帖工緻起八字妙但宮居二字不好吾甥好學好問故一髮不貸如此甥所作比近時所見又進矣可喜可喜勉之勉之

又

承惠字甚喜所言言言允當可謂愛之之深使其能一一謹守則吾何慮之有哉勲兒既見之後仍賴苦口戒飭之姊夫家祇以自家子姪待之有不是直戒切之尤所願望見之只令在中門外不必令入中門一步此一

件不妨以客禮待之也見令具榜子去叅諸尊長但見
二令叔祖不可無榜又不好下只得下眷姪孫三字如
何所當見之眷家前輩望一一引之進見教其不及扶
其不至包其不能是所願望舉業一件今日相尚不做
舉業往往只理會作詩真實詩不易作簡不可不作想
子弟漸長此等亦漸作對簡詩口義之類皆所當習然
詩且當作絕句先五後七未要便作律詩做絕句三兩
月見蹊徑方可問津于律向來老成而能作得詩成者

自少況初學乎先易後難漸近法也勲孫字畫未成不可寫本見付去黃字顏字令摹以授同牕某小年編錄太早致終身寫字不好雖教學今三十有六年未嘗與學生寫一幅本不過摹本而已日間不可一刻放過燈下只宜立定程限讀日間書每般讀幾遍讀足便就睡子弟精神有限不可徒久坐而瞌睡徒損其明日之精神無益也

又

初九得家報方知邑中有公移到來賢甥宜與說作此
冤家有何實益其子學于吾者五載今反以德為怨平
昔自恨薄命不偶動遭反噬以為芝蘭而滋植之變為
荆棘以為鸞鳳而卵翼之化為梟獍者往往而是孝友
睦婣人之行也令叔一房上而事父母次而待兄弟族
人外而待師友于此四字如何天理人倫有是乎沉毒
陰狡最損人福平白善淑最增人福甥其開譬之若十
分難言望勿吝一行面盡其委折尤好

又

此回之事亦是宅中房下一項大變折得一番大禍近聞犬屢升屋蹲而吠此妖也仲耆一病此怪證奇疾也此誣興而病遂愈豈非破財折災乎甥宜以順處逆以待天者之定于此事拋棄之不要留在心曾吾所望于甥者甚遠宜以公平正大為心不可一毫效彼也回宅時千萬過吾家詳細言之塞上翁曰安知非福乎尊祖厚德所以待吾甥一房者不薄其面以喻我之意甚好

容面商之然後力贊其決吾于甥所關繫付托非小事甥切宜克己自強以慰老懷吾于此當拭目以覘甥之遠業初聞必不平以古君子之事觀之以理遣之未有不平者相愛之深慮其因此饑寒或生疾也切望自愛

與梅屋叔

某有小事仰瀆尊聽近日與可叔面言要割稅入敝戶此若出于戲言則付之勿言若或果有此意乞賜一言力止之敝戶惟其無稅錢所以可與學中打捱若纔有

百貫錢稅便為所牽持矣五城省七兄嘗笑黃麟哥謂先祖通判做一世官不肯受親戚族人一文稅錢寄附見得一介懦夫儒戶而受人稅錢今日但見小利未覩他日之大害耳此可謂名言若夫包納本戶一二百丈稅則尤利之小者便是貼之以七十分亦不願受此小利以貽他時之大害割來易割去難某人之事可鑒也可戒也謹以直覆千賜以仁人之一言瑣瑣冒瀆恐悚恐悚伏乞尊亮

與春塘叔

日昨領尊翰為曹學錄求贈行詩序引嘗多奉答殊
愧草率繼而思得其說奮筆一揮而成議論頗精切不
可移之它郡它人節節照映句句工密字字秤量知良
工心獨苦者其惟吾叔與二三知心乎番陽名士如林
所謂作文要可張吾軍然後可以出手不然是辱吾徽
亦自辱吾鄉貢進士也諸公贈行詩章亦宜彼此互相
指摘推敲不至貽芝山羞為佳劣姪行年七十有三老

矣其言雖苦而味頗腴聞者當不罪之秋崖耕綠堂詩
錄亦人以為記尊翰亦以為記非也此詩恐不可出以示
人內有諸人讀書不如睡又云者也之乎助何事譏斥
鄙俚似非其得意之作後一首可以出手必元自有真
蹟奚以某之再寫為哉此說不及奉命非懶也叙引繕
寫呈似過尊目以授曹君

復實卿姪

名光

近日作答信後某日高一哥來方知所寄還程松谷文

字挾以自隨將歸後送還之未幾到與可處今必歸矣
見發程君可大所求之文到敏求兄處遺像記頗自慙
鄙意道理亦實是如此輓章不為好却見盡其家世平
生履歷及塋地亦一字不可移用于它人所贈言則不
可言序序必送人行乃可言吳丈與夏放皆謂之序恐
無此體例也夏放最亂道汝何人敢大言無當將與卿
大夫上之司徒初見即擲之非之不擬來取也此人乙
卯生邑市無人推薦此等無狀無識之物可哀也哉今

亦死矣康節云還知虛過死萬遍却似不曾生一般此物足以當此漫及之可發一笑賢姪所寓渠宅多好書半年數月後可以逐旅借看亦一大好事預以此賀吾曩歲見好文字必抄或摘每歲必進得一兩書嘗自笑與老婦言之今年又買得一件書田矣自到瑞溪後使不能及子西揔管亦頗有好文字初自江陵回得文公儀禮全書七十冊嘗妄意欲抄取一部繼亦成悠悠今年老眼昏花不能償此願遂為終身之恨亦漫及之言

此者勵吾姪可為之時勿蹉過也

與高四叔翁

去年婺源胡雙湖數相勉將蔡氏書傳編附錄纂疏勉從其言成得三分之一繼而海口董養晦又挾雙湖書來欲借所編采入其叔父董深山所編中以不見深山所編拒之不發今夏養晦之來携乃叔所編四冊見示遂亦發數篇授之蓋深山之子季真將携入閩板行甚堅彼中已有刊主矣近季真貽書盡發全書共十一冊

來諉以刪定但其所編多汎濫不切自家議論尤泛使人不滿其書先已經王葵初及雙湖刪之矣葵初丙午生好見識遂因其已刪者而痛刪之秦誓以後者與董相叅次第將畢却將董編叅取自堯典以至微子合為一編蓋此原有書解折衷故成之頗不甚費力近以十餘篇浼高一哥錄取一本為底本高一哥亦自錄一本不審畧曾見之否如未見則高一哥解盟時必可携歸共看也今番此書覺無餘蘊矣老來自苦東坡所謂頗

利前賢予骨朽後人眼目亦自憐也因有餘紙偶及之餘需後
便切冀心亮

又

蔡傳集成亦聞置一部此名亦大言無當到何處謂之
集大成初與約並名而刊為改乃父之序文外面書套
之語亦商量寫定到後一切反之今刊者却是元序何
等猥談初焉用半年之力授以成本之時震哥云彼拐
先生耳至彼必自刊乃父名予對以未必其然我之忠

厚不逮後生之明了遠矣此不緊要也愚謂其中有精切而遭去者無限逞其憊懼之辭易其擔當之語往往有之奪吾說以畀新安胡氏者五十許條雙湖在必不容其如此內他人名字差錯者不少字畫差錯無限初授之本外添熊氏之說無一而是禹貢中有大亂道之語由南而窺址等是也與禹貢初無毫髮干涉徒爾大言以見其博此子不識妄加去取令人憤悶不得為完書也已改定成六卷近日方畢非一紙所能盡其詳自

述一刊蔡傳本末當携歸與高一哥一觀庶怡然賞之

又

十五日迫晚僮來領惠字已悉虞夏書已有茲不發盡
發商周書去董之罪不在畔盟不並名以刊而在妄刪
節割裂使看不得有遺恨中間胡雙湖實無一字凡新
安胡氏曰者皆吾人之說也雙湖至公平使其在也必
不肯如此董亦不敢如此因筆及之仔細將此本與刊
本點檢便可見楮筆不能盡也字說昨早方成亟亟書

去餘需嗣使心亮為荷

與黃求心

不面不書忽忽數載兒姪輩來往幸得略聞起居然終
恨不得親承博約之為快也去冬聞今歲携琴書為汪
溪游甚喜當易于盍簪豈兩各匏繫條閱一兩月一見
尚難偶外甥吳仲文過我謂特欲造函丈進拜遂拜此
字以問近況此甥乃某女兄之第二子自少頗篤志于
學數年前館于歙因得見弘齋先生甚蒙稱賞回其一

啟頗期待不薄繼嘗以其詩藁呈虛谷先生亦蒙其賜
一跋期待尤不薄試一印之可知今歲先定向果一館
以意見不合力去之偶見過聞梅結有一館未有人試
為一詢之偶一言而合初不知其詳及其至也乃又有
不愜其意者年來吾道固厄而此甥之厄又甚焉亦嘗
多方開解之順而安之可也某于兄長託深契故畧及
之兄長有可提撕警誨之者幸勿吝鼎呂來歲仍館于
長干滄洲金大暉時當必有此行桐岡自杭回滄洲必

見之兄長得暇與偕行一游亦好但主人留外踐迹不欲假如何偷閒先一省見亦不敢落後也楮盡只此切丐尊照

與金滄洲

久不簪盞多相燕鴻近聞台候稍稍違和天相吉人想已平復茲有少稟外甥吳仲文後一輩行之可望者方曹二公皆稱許之今歲為梅結游某自悔其輕于一言此甥素聞先生斯文北斗吾道東風意欲下荊州之拜

遂拜此字為之先容有可賜提撕者乞勿吝其詳見求
心信中茲不贅桐岡自杭回車後當必過此又可飽聆
誨益也乏楮修字不謹伏干恕答

與中澤程氏

去冬留邑郭獲晤語豺狼不問麟鸞受誣徒為左右嘆
憤蔑如之何別後啟處何似乏便不及書每切馳情最
是失禮尊兄昆季令姪昆季其不以薄誼咎我者幾希
茲有白事未言先慚昨歲兩薦塾師兩蒙聽納竟皆為

反覆者所誤遂誓不復言此事今茲有言恐尊兄亦笑之厭之矣然尊兄見超凡庸當亦鑒某非故欲相誤特為人所誤耳舍姪名光字寔卿戊子生從小問業質疑于某學識頗正筆端亦俊性行甚純字畫儘楷現亦習應舉之文近寄經疑十篇加之淬礪儘可應試兄能見聽置之西塾令姪令嗣不為無裨某非如王氏有譽兒癖知心之前不嫌其直也

答考水胡盤溪

代子西

此貢柔緘特厪答翰光芒飛動與二寶而三珍感感某
前日以瑣尾細故不獲已又修字為記室瀆發未二昕
夕而秦使突如其前晉帖翩然而下矣其何以當之某
材侔襍線恩受言絲上有七十歲之親遠為二千里之
後半山所謂古人一日養不以三公換有味斯言趙趙
久之家嚴時勉之行君親之命俱有不容違者遂方敢
為行計避左里之險道出九江不獲稟違政此自訟詎
圖誼雲郁穆叢珍稠疊嘉而貺之禮甚豐也卻之不

恭受之有愧與其不恭也寧愧登嘉勉受何以報之外
辱霜蹄謂賜虞祖屈產之馬似復晉歸其不欲明言卻
之耶禮記所云如斯受賜癡兒何敢不拜

謝送墓

某近者卜墓先君過蒙尊慈崇篤契誼遠賜賁臨范張
交好乃今見之先君有知銜茹必矣況于其孤其何敢
忘日欲躬走仞墻以謝迂臨之辱恐勞起居以故不敢
輕率是以飭墨卿以代面謝伏乞穹照不具

謝履襪巾幣

某昨者讚揚好事慚愧善歌曾微拍調之過雲遽賜縑
繪之疊雪讀所惠翰知雅意已先于未將以迹觀之則
似磚之拋玉之引也念舊憐貧煦濡而濡濕之在左右
為盛德事其如老生之不遑祇受何一拂拭一步履無
非銘篆恩私時也亟此占酌言不盡謝何時簪盞悉留
面既

謝星源王正山豬肝及酒

懶殘爐邊六花誤約孤負燈花如此空樽何青州從事
與公子彭生攜手同行惠而好我從事曰相與入醉鄉
可乎彭生曰吾平生吐出肝腸豈曰豕交之哉二子辨
不已某捫腹而謂之曰此中空洞無物能容卿等數百
人願借前箸籌之二子曰善竟歸心腹

代達汪靜軒

某昨效龐公之入城勤陳蕃之下榻擾春風者深矣揖
別言歸一步一感渴教信宿尊仰方新待臘之柳露青

賓春之梅綻白乘咸臨之吉利迺開泰之亨嘉此其時也仁者之靜與松蘿俱凝定仁者之壽與椒栢俱延長歌擷澗芹以將此頌惟尊慈不以其輔瀆而翕受之則百斯幸以序附特此致意以達愚誠等祈尊恕

答黃叔玉

某不見叔度鄙吝久生又得山谷刀筆鄙吝亦掃而空矣梅簷展玩踈花與有德色某茲蒙親慈以寒家增累特貽慶言且有珍貺此何足掛齒牙者君家山谷嘲小

德詩曰中年舉兒子漫種老生涯解著潛夫論何方無
外家此兒之育適可似之敢借此詩歌之以謝短帛占
酬不敵先施統祈親照

寄鄭時菴

某昨留都下與君為莫逆交真異姓兄弟也英游時乃
坐他冗不克躬餞迄今愧之猝猝言歸念欲即詣鄭公
鄉以訊近履寔沈崇之尚未脫然坐是力不逮心非意
所料即辰春和景淑寅想榮侍萱親婉容愉色昔人所

謂壽觴舉慈顏和者不得專美矣健美健美少需賤體
可以奔趨即容問師潭途伏謁墀下以究所懷也不腆
芹蓰少寓寸誠一笑領之幸甚

答鄭時菴

某春間虔貢一箋隨沐響答繼飭剗墨方蒙瀆是慚未
幾側聞大旆祈純嘏于星溪滿擬回轅可卜望塵之拜
詎意德星之聚竟成參辰之不相比也政茲渴仰劃捧
誨函義幹情條燦然十從事之內燕山昨夢居然喚醒

並轡連床易得之半萬里外握手論心乃艱于纔三舍
間今之隔濶牽于人前之會聚相之者其天乎靖惟執
事宇宙一菴時止時行與道默契止者暫也行者分內
事也先為時棟榱桷或以次收焉予日望之焉用佞多
儀寵賜充叔衡茅卻之不恭勉拜雅命之辱緬想德門
仙輶逍遙水晶宮中暑溽梅蒸潛却無朕彌深歆羨未
見為憾幸游心蔗漿錦棚之適以待殊綸不宣

答李泰宇

某茲承一札遠餉多儀繫雪天之玉狸橫冰泉之赤鯁
塵出麥岐之秀意見李蹊之真有笏可拄耶莫倒持否
無波相及者如乾沒何

與戴廷芳

蒙台翰緘示寄府判先生佳章感激感激忽忽未暇載
賡姑少俟之前日邂逅季澄學正嘗面稟欲附課稿還
寔卿姪已荷留聽昨晚携至摠管宅則知入長干今早
問已回轅矣茲敢附去轉為左右瀆得附示此姪不至

沉浮多感多感屢許以虛谷續詩寵假尚未示下得終假惠之幸甚不敢污損當珍護以歸奎府也

答汪景初教諭

近得盍簪別來倏兩閱月茲領妙墨如接晤言保舉一事魯兩生不肯行寔以年未及格亦理當然非有他謂也荷再諭及足似誘掖之盛心賓場侍其尊翁在邑見心則以其尊翁亦在邑未敢聞斯行之所達總管書敬留于此俟歸授之如有令兩生行之意尚當具年甲籍

貫以聞止軒之文幾忘之矣近有目疾不欲苦思以甚之俟有佳思則綴緝呈似不具

代金赫翁答季澄

伏辱誨示以先人襄事特加問勞足見篤叙之高誼劇切知感彼時自合走報蓋以路遠且春雪連作不欲重勞是以欲報而不果今謙翰拳拳雖親辱執紼亦不是過謹拜此以謝鳴謙之辱不遑它及切丐穹照

又

春首詣仇牆展履端之慶禮也既而冗奪至于綴麟令
旦親稱觴致椿松之祝尤禮所當然又以冗不克趨前
于是簡慢之咎愈不可宥矣過期之餘甫能擷溪毛以
見區區公其謂某何如人哉謹拜此以鳴其所以然亦
首罪之一端也惟尊慈鑒其隻影而貫之則百斯幸矣

與汪季澄

不侍誨論一瞬許時箋敬區區亦以無謂不敢穹遡寸
忱則不以書問䟽數為恭慢也茲特寬度僭有稟瀆此

月朔日承本縣文書為路學儒人不陪拜事勾喚且罰
鈔小生自甲辰秋丁及甲寅五月拜朔十五年間外皆
蒙前任諸學官寬恕今忽例遭勾罰此必學司混同呈
上梅先生未必注意及小生也茲拜梅先生一書懇之
書之辭語婉曲當蒙矜體茲不揆為高明瀆如達乞願
指左右為逋上如不欲自發去則潘半村鼎兄石養蒙
正兄二表兄次第挽一兄為授之亦可萬丐必為授達
不至沉浮寔為至幸瑣尾塵瀆非恃契愛不敢及此不

遠胥晤當得面謝伏于台照不具

答汪稱隱

此者不揆蚓竅蠅聲僭賡休官五詠過辱鳴謙鄭重以謝此奚以謝為哉前輩謂進之難不若退之難至以放竊出籠縱魚入壑自喻其樂可想也今者先生全節而退高矣先年而退尤高也高之故樂聞其詩而和之此奚以謝為哉取于造物也廉故造物之報之也未取之不盡故享之亦不盡先正定齋翁不盡取之留以遺公

而公又不盡取之留以遺二季位不滿其德天之與平陽氏豈可涯涘也哉某不肖方年六十有三可以進而自棄不進先生嘗廻顧之期望之負此知己每竊自愧今忽忽七十有五矣猶不免傍人籬落是亦不可以已乎何當得脫此縛從公于山之巔水之涯以傾倒所懷也未卜省謁惟冀厚自珍護以躋上壽以儀鄉邦謹拜此以謝先辱伏楮拳拳不宣

與程材仲

某昨日蒙書招致之為一二日之留叙十四年之別
飲食之錫予之賢昆季之于故舊得之矣老拙無以當
之如愧何揖別言歸彈指頃忽忽數日感激未渠央也
面諭令薦進名術嘗以嚴陵項君松山對歸之次日適
會之于族叔與可家與之言適值其將經過鄭里之的
便遂以隻字為之先容或即偕之歷覽以訂所擬或與
之約而需后期一聽裁酌此文游諸公間多敬信之昔
年子西之墓親三田松山與焉去年之墓內赤丘松山

專焉以賢昆季之高一見之餘必自能賞識之何待愚
言之贅哉以拳拳塋親之心適召地仙之至似亦有緣
法焉未見願清心養氣以迎多祐令兄處不及別字稟
不殊此松山行速拏楮拜此殊愧草率惟高明恕鑒之
不宣

慰曹濟之

某頓首拜申慰濟之教授學士尊契家兄大孝某近三
月間抵邑詢尊祖老師近履知無恙方以為喜留宿數

日而未歸未幾忽有風傳老師訃音者驚呼惶惑驚者恐其真也惑者疑其非真也未幾吳觀萬歸自邑方知其傳真矣嗚呼平昔泰山北斗之仰今其已矣恭惟老師判簿先生乾坤間氣海宇偉人方為程文闕舉子之口而奪之氣及為師儒炳紫陽之燈而傳其心全節無瑕上壽有永何可憾者二賢嗣之先沒數也伯魚先孔子卒雖先聖不能免也六賢孫之善繼理也子思續道脉之傳賢昆季所當勉也某自聞訃音即已動念謂辱

老師之知自丙申迄今二十年平生無知已知已惟老師一人耳苟不親往以哭以弔于心安乎即與觀萬商之擬以少暇同觀萬黃求心問葉舟之途而慰有日五月又抵邑則聞諸菊存先生謂昆季或它出恐小生輩之行或參商不相值盍尼斯行小生思之有如龜山所言於心終有打不過者無以寓意謹致雞酒之敬撰一奠文以寫拳拳惟兄為焚白焉萬幸令弟諸兄長一一呼名尤幸諸兄荷祖父道脉之傳而尊兄承重之責尤

重惟節哀順變以遠者大者自期至望至望茲拜字托
菊存遞呈伏于台照

答汪古逸

某自去冬復書後今春有傳先生今歲携琴鴈塘者為
之甚喜喜也者喜其有拜識之機也忽又傳先生遭齊
衰三年之變者為之大戚戚也者想其同我三十四年
前劬勞之痛也又恐因此未必遂拜識之願也度老病
必不能往弔則欲附一書以慰探便無從迄今耿耿戴

兄廷芳連日留外家謂其居距鴈塘可十里可附書正
欲今早作書而昨晚篝燈時領先生所賜誨翰矣感甚
愧甚靖惟壽母太孺人年垂及百躋登高壽雖未知垂
悅的何年以尊年六十六則太孺壽數可以想見人間
世誰有以六十六之子而得事幾百歲之親乎老天于
先生厚矣生也有涯數必有盡今日之變可無憾矣先
生于禮已在不毀與惟衰麻之間當體母氏之心為心
母氏之心豈欲垂白之子致毀過哀以戚我冥冥之懷

乎先生念及此可以酌居喪之禮矣先生知及仁守何待愚言欲持服于家思親之仁也今過卒哭之期以勢而赴館亦交友之信也交友不信亦在非孝之科先生處之是矣又何待愚言然猶不能忘言者蓋欲先生因愚言而寬旅中之懷耳

慰程前邨

近董季真行嘗附答書方掛漏是懼江照磨至又辱寄聲時前書想未達今想已達矣照磨未幾言先生近惟

壽萱太夫人之戚某聞之驚嗟失聲徐問太夫人之年則上壽九十年登九十百千萬億人中誰能有之以先生年六十有七而上有母在百千萬億中人又誰有之天之厚太夫人至矣厚公尤至矣自他人觀之足可無憾公孝誠天至新懼此變恐不能堪然證之禮六十不毀七十惟衰麻在身以衰麻在身言雖少不及以不毀言則已過之願酌其中而處焉向者畢梧山之母徐生于文公夢奠之年年九十三而沒梧山甲申生年已六

十九乃母初病時丁寧梧山云我年九十以上已大幸
汝年垂七十宜為我自愛汝若過于哭泣我冥冥中亦
不歡喜汝宜深戒之想太夫人之見亦必如此禮書公
所自悉言之似贅敢援梧山之母之言以為公告某久
客梧山門此語寔錄也願公深體焉前輩云萬人叢中
一人曉性理文章萬人叢中如公者敢無一人望公為
太夫人自愛為吾道自愛儀州里以幸後學某三十六
而喪父四十三而喪母家貧不能養欲養親不待以公

之家其旨必不缺且親享高壽仰視之愧死對照磨畧
言不覺涕泗橫流也願公鑒此而自覺焉至懇至懇

慰友喪父

某久不交書則亦有以中間聞執事有何憂戚而未詳
茲會廷芳方深知之始敢虔修此紙首惟鑒察某比者
不意慶門凶變有尊翁府君之戚府君橫舟老師之嫡
嗣聞名久矣而未及識於癸酉鶚薦之文嘗得伏讀之
甲戌混補回途得叅覲之人物頎然玉立今猶隱隱心

目間不謂纔償識願而遽仙遊也禮為人後者為之子
執事懼此與所天同哀悼何以堪然又聞之在禮有不
言而事行言而事行身親之而後行之分況不免任人
子弟之托乎此其不可為一概之哀也明矣執事熟知
禮意何待愚言想三虞之期已近之或過之矣願以遠
者自期此區區下交之所望于心契者老衰道阻不及
面慰而以書惟孝子仁恕察之茲因廷芳回附此以寬
台懷匆卒不具再拜申慰

慰戴時敏

此者不謂慶門凶變尊翁堂錄太師老先生奄棄明時
始者風聞疑而未信夫以尊先太師後學山斗昭代著
龜縱不為衛武之九十入相亦何妨如伏勝之期頤傳
經乃今天不憖遺奪此大老使後生于何而考德時巡
于何而就問識與不識皆為流涕矧足下純孝天至其
何以堪然有一說可以舒足下之深悲老子有言死而
不忘者壽不忘何也死且不朽之謂也古有三不朽曰

立德立功立言老先生德為人師言為世範著書立言
部使者已轉而上聞矣行將垂世千古不朽尚父天命
之壽與臧文仲身沒言立之壽相維于無窮視相如之
且死而以封禪書獻諛者過之萬萬昔吳人謂孫仲謀
曰此豈孝廉哭時願以遠者大者自期勉進久大之德
業扶持先生所著書章章永傳其視僅以一至之哀自
任者為何如某不揆僭越以慰以期惟足下抑哀順變
不鄙其狂愚而幸聽之禮合躬詣總惟一辭一慟予以

哀死而弔生顧影自憐有願莫遂慰唁紙又墮魯臯惟
高明恕而察之不宣

慰胡濟鼎

某茲者不意慶門凶變壽母太安人奄棄榮養執事孝
誠天至愛敬兩全考叔之羹將有待而遺孟宗之鮓將
有待而寄一旦遽遭此變何以堪諸自茲以往返哺而
烏何在卧冰而魚空肥甚為哀慕蓋可想見自耳茲聞
傷悼曷勝即欲一詣總帷以哭以唁家事如蝟酌應不

遑外奔內馳日不暇給忽忽歲蛇赴壑矣既躬造之弗
獲又隻字之復稽縱寬度不督過之愚獨不愧于心乎
是用拜此以代面慰更望節哀順變勉進饘粥以顯揚
自期是所願望今昆季翰學至孝不果別狀意不此殊
統祈親照

慰曹弘齋

某不修箋敬整整經年非于師門簡慢也不欲無謂徒
瀆尊也近此月初吳甥過邑郭會仲玉學正知次令嗣

希文抱恙問何證謂胃弱不納食某雖不敢言固已竊
隱憂之無從問訊日俟平復之音忽社后之四日竹牖
寄聲見報謂希文竟不起矣驚駭痛悼無以為懷有是
哉慶門之凶變一至此哉先生與判閫安人俱以八十
之高年而罹此倒置之大故其又何以為懷昔人為陶
士行言越騎酷沒天下痛心何況人間父子情乎自聞
此變即欲奉慰然亦無說以寬先生之憂恐祇以重先
生之戚耳要之人稟受符直二五之氣數或厚或薄或

長或短天也非人之所能為也亦惟順天而已莊生曰孰使我至此者非天乎況希文懿行奧學高文妙畫種種出人又且諸郎俱佳不惟克其家而且世其學而又有孫竹立矣年登五十有五已不為夭如東坡所謂人有文為不朽與有子為不死此兩言者希文足以當之所使人不滿者以八十之親而繼哭五六十之子則為逆耳此為理之所不可解要亦數之不可逃先生高明有素處常達變必有可以自寬自釋者何待愚言天下

禍變亦要人當夫子萬世宗師早哭伯魚僅有子思為
之孫亦待曾子而成就之先生今茲事體不高于宣聖
數等乎願先生順天所命加慎眠食以躋登伏生高允
以上之壽是所願望茲因便風附此拜慰不覺覩縷惟
尊慈鑒之不備



定字集卷十